

JUDAS

Jesus hã h'yy ka'eeh do hã Judas ma erii wät do hahÿÿh

¹ Judas, Tsijaag hÿÿj, Jesus Kristo wë moo wät do see ÿ ti hÿÿh. ÿ edëng bëeh, P'op Hagä Do naëj wät doo, P'op Hagä Do ër Yb kamahän doo, Jesus Kristo mo n'aa jesuu doo. ² ÿ karën ji wë P'op Hagä Do ky ennym doo, ji tah'yyb n'yyim doo, ji takamahän do na-ãj hë baad bë h'yyb gó tabawäd had'yyt hë.

Ma matëg oow P'op Hagä Do waneh'ëeh do sa ky n'aa hahÿÿh

³⁻⁴ Najis haa, tak'ëp paa ÿ karën paawä bë ÿ ma erih ër P'op Hagä Do edëeb wät do ky n'aa hã. Tii bä kä, h'yy kamep'ëeh doo me ajyy P'op Hagä Do waneh'ëeh do bë mahang rababoo däg kãn ÿ ky n'aa napäh bä kä, nayyw hë ÿ h'yy kahÿÿd däk ÿ erih do hã. Bë ÿ ma erih hÿÿ kä tak'ëp ÿ betsëe hyb n'aa bë hã, baad bë ban'yyh hyb n'aa panyyg hanäm do ër ky daheeh doo, ta karapee, tsyt hë ta wë kasëew bong do sa hã P'op Hagä Do an'oo däk doo. Bë an'oo manä ta wób rahÿÿd. Nanäng ajyy rah'ÿÿt ji wë P'op Hagä Do ky ennym do ky n'aa. Ji wë P'op Hagä Do ky ennym do hyb n'aa, tahajaa, sa nooh, jé rakarën pé sii raba'ÿÿh. Ramakyyys Jesus Kristo, sét hadoo do ër kariw n'aa, ër danäh, ër Wahë N'aa. P'ooj ub P'op Hagä Do kyy kerih doo gó takerii däk nyy da nesaa do hã P'op Hagä Do ky n'aa etyy da ta ti hedoo doo.

⁵ Bë hapëe däg né paawä nyy da takerii däk, ÿ karën bë hyb n'aa esee hahÿÿh: Esit häj n'aa bä naa ta karapee Tak'ëp Hyb N'aa Jawyk Do manyyh jawén paa bä, tagawatsiig jëng sa mahang ky sëm do paah, ky nadah'eeh do paah. ⁶ Bë hyb n'aa es'ee na-ãj hë nyy da Tak'ëp Hyb N'aa Jawyk Do bad'oo ääs wób sa hã. Ta ti ääs wób dooh paa rah'yy gadeja bä sa hã P'op Hagä Do anoo do hã rabag'ääs do hã, raty n'aa ges'yyk rababong do paa rawén beréd hõm tii. T'öp gadagyp doo gó baad rakamaw'yyd däg had'yyt hë Tak'ëp Hyb N'aa Jawyk Do an'oo bä, ta tii bä ragada hyb n'aa sahõnh hë P'op Hagä Do ky n'aa etyy noo gó sa hã taky n'aa etyy doo. ⁷ Ti hadoo panang Sodoma, Gomoha häd enäh do babuu j hã, panang nedaa bä haj'eenh do hã na-ãj hë. Sa hã P'op Hagä Do rejää do hã takametä däk nyy da P'op Hagä Do bad'oo da tii d' habok do sa hã. Panang buuj rahob had'yyt hë tëeg hõo nadëek doo gó. Tii d' rawén hoop, nanäng ääs rabad'oo doo da rabad'oo

paah. Tak'ëp baad nadoo do panang buuj ramoo heb'oooh paa sa hã hanäng doo me. Ýÿj nadoo do sii hẽ rabahe'ÿÿh paah.

⁸Ta ti hedoo nanäng ajyy P'op Hagã Do waneh'ëëh do bë mahang haboo däk do rabad'oo. Sa s'ëë gó rahapäh do jawén rababok. Sa hub rarejãã tak'ëp baad nadoo doo me. Doooh ragado bã Tak'ëp Hyb N'aa Jawyk Do ji hã tamejüü doo. Raky n'aa rejãã kabaj'aa doo.^a ⁹Mikéw kã, ããs sa wahë n'aa né paawã, dooh taky n'aa rejãã doo me Dijab^b taky n'aa tapa bã, Mosees kamag n'aa p'ãã Nesaa do Yb daheeh taky kedak noo gó.^c Jããm hẽ hahÿÿ da Mikéw kyyh Nesaa Do Yb hã: “Öm da Tak'ëp Hyb N'aa Jawyk Do nabuuj gedoo.” ¹⁰Mikéw bad'oo doo da nado nanäng ajyy bë mahang kamekuuj däk do rabad'oo. Tak'ëp baad nadoo doo me raky n'aa rejãã ranahapäh do hã. Har'ëëng h'yy ganenäh do hadoo tii. Jããm hẽ rahapäh rah'yy karën doo. Jããm hẽ ti jawén rababok. Rah'yy karën do jawén rababok doo, ti né ti sa hã rejãã doo. ¹¹Tak'ëp baad nado da sa hã! Kaïh bawäd wät doo da paa rababok. Dajëër hã tak'ëp rah'yyb padëëk do hyb n'aa, Barãm, p'ooj ub hawät do baad nadoo do moo wät do paa bad'oo doo da rabad'oo. Aj'yy, Korah maküüh, Mosees Arãw sa wë h'yy kawareem do paa hadoo ta ti rah'yy kawereem Jesus hã h'yy ka'eeh do sa wahë n'aa wë. Ti hyb n'aa P'op Hagã Do gawats'iik da tii. ¹²Séd hã bë bawëh bã, bë sii rabawëh bã, dooh ranu mebyy bã, tak'ëp baad nadoo do ramoo boo né paawã. Pã ji nahapäh do tame hanäng do marakate gah'ood jëng do tahaj'aa hadoo do hedoo ta ti ajyy bë mahang.^d B'éé hagã n'aa jããm hẽ sa hã hẽ hyb n'aa newëë do hadoo tii. Naëng poo mahauk do tabës doo, ji tawadii do hadoo tii. Joom beaak noo gó neaak do hadoo tii. Joom tsawyy jëng doo, nedëb wät doo, ji tagoo hõm do hadoo tii. ¹³Maadaka hewëëh do akajar me bah'ood mahüüm doo, ta puh ty gasus do akajar nabyy me rerét do hadoo nanäng ajyy. Ta puh ty gasus do hadoo nu meby n'aa näng do ramoo bok doo. Sagõõh daap ty gehüüm do

^a **1.8** Kabej'aa doo, ããs P'op Hagã Do karapee. Kabej'aa do na-ããj hẽ ããs wób nesaa do moo bok do paah, Nesaa Do Yb karom.

^b **1.9** Gereg kyy me ramaneëënh Nesaa Do Yb, Dijab. “Ji taky n'aa tapa had'yyt doo”, tahanäng pé ti Dijab.

^c **1.9** Hahÿÿ da Judah buuj panyyg see hã takerii däk ta ti ky n'aa: Mosees dajëp noo gó m' P'op Hagã Do mejüü mã ããs sa wahë n'aa Mikéw, Mosees kamag n'aa tadakã jëng hyb n'aa. Tadakã paawã m', Nesaa Do Yb ana ta wë. Nesaa Do Yb karën mã Mosees kamag n'aa paah. Esit buuj see Mosees naboh jat do paa hyb n'aa m' Mosees mã ta karom, näng mã Nesaa Do Yb kyyh. Tii d' né paawã Nesaa Do Yb karën paawã, dooh m' Mikéw an'oo bã ta hã Mosees kamag n'aa paah.

^d **1.12** Marakate pä rejãã doo da, Jesus hã h'yy ka'eeh do wób rarejãã, tahanäng pé tii.

hadoo ti ajyy.^e Tak'ëp gadagyp do P'op Hagä Do ennyw hõm sa pooj jé. T'ĩ hēnh raboo had'yyt da.

¹⁴Hahỹỹ da aj'yy Enók häd näng doo, setsi däg do Adāw bā naa ji etsén bā, tamaher'oot paa ta jawén hawät do hahỹ ajyy nesaa do sa ky n'aa: “Bē hegāā”, näng mäh, “ti awät da Tak'ëp Hyb N'aa Jawyk Doo, tak'ëp hajök do ta aās tak'ëp baad hedoo do sa daheeh, ¹⁵sahõnh hē taky n'aa etyy hyb n'aa. Nesaa doo hēnh taky n'aa etyy da sahõnh hē, ta matym gó baad nadoo do moo bok doo, ta hā waneh'ëeh do hyb n'aa baad nadoo do moo bok doo. Nesaa doo hēnh taky n'aa etyy da sahõnh hē, nesaa do moo heb'oooh do rabahadoo do hyb n'aa baad nadoo do P'op Hagä Do hā raheer'oot do hyb n'aa”, näng paa Enók. ¹⁶Sahõnh hē hā raky n'aa hajēew had'yyt hē. Raheer'ood had'yyt hē ti sa hā dooh baad tado bā ti ta wób ramoo bok doo. Nesaa do sa h'yyb karēn do jawén rababoo had'yyt hē. Sa hā hē rah'yy kasab'ee sa ky n'aa hā. J'ooj madäk doo me ta wób hā raj'aa etsé ky ken'yym doo me, sa daaj hē rakarēn do ragadoo hyb n'aa.

Ji h'yy ganajēē hõm do ky n'aa hahỹỹh

¹⁷Najis haa, bē hyb n'aa es'ee Jesus Kristo er Wahē N'aa mejũũ doo, 12 hedoo do bē ramaher'oot do paah. ¹⁸Hahỹỹ d' paa sa kyyh bē hā: “Jesus matēeh do pooj jé, ti abok da nesaa do sa h'yyb karēn do jawén habok doo, bē raky n'aa wajahēēt doo”, nāk paa sa kyyh. ¹⁹Séd bē h'yyb nahedo bong ran'oo bā ta tii. Bē ketyn h'ũũm ran'oo bā. Sa h'yyb säg karēn do jawén rababok. Dooh P'op Hagä Do Sahee awäd bā sa h'yyb gó.

²⁰Bēeh, najis haa, taw'ääts hē baad had'yyt hē bē h'yyb padäg panyyg hanäm do hā Jesus mejũũ do er hā rama met'ëeg wät doo, P'op Hagä Do hā hana doo. Ta tii hā bē h'yyb padäg, bē h'yy kahejój magyys hē hyb n'aa. Bē ky n'aa ets'ēē bē hā P'op Hagä Do Sahee h'yyb mahũũm doo da. ²¹Taw'ääts hē bē an'oo P'op Hagä Do kamahän do bē h'yyb gó tabawäd had'yyt hē. Taw'ääts hē edēb had'yyt do bē gada, er tat'yid mehĩĩn do hyb n'aa, Jesus Kristo, er Wahē N'aa, er hā tanoo doo.

²²Taw'ääts hē bē t'yid mehĩĩn jé häd ky sēm doo. ²³Nayyw hē bē maher'ood ta s'ee hēnh sa h'yyb baboo dāk doo, tēeg hõõ

^e 1.13 P'ooj ub akajar me habong do raheg'ääs sagõõh rabahapäh hyb n'aa ny nemuun rabahõm. Dooh tahaja bā ramatakā bā *sagõõh daap ty gehũũm do* hā. Ti hadoo, dooh ji haja bā ji ky dahé bā nanäng ma matēg oow. Ta s'ee hēnh ji rah'yyb mahũũm. Tii d' tahanäng pe tii.

nadëek do mahãnh ta ti bë bed'ëep hyb n'aa. Bë t'yyd mehïin ta wób tak'ëp baad nadoo do moo bok doo. Sa hã bë t'yyd mehïin bã, taw'ãäts hë h'yyb eỹm doo gó baad bë hyb n'aa matakã, nesaa do ramoo bok do bë tah'yyb tatug mahãnh. Taw'ãäts hë baad né hë bë kanã tak'ëp nesaa do ramoo bok do mahãnh, ramoo bok do bë tah'yyb tatug mahãnh.^f

²⁴⁻²⁵Sét ub hadoo do P'op Hagã Doo, Jesus Kristo er Wahë N'aa hyb n'aa er tedëeb wät do hajaa bë tamo n'aa jesuu nesaa do bë moo boo mahãnh. Tahajaa ta bag tak'ëp gabarëeh doo gó bë tamanaa, tsebee gó ta matym gó bë bab'ëeh hyb n'aa tak'ëp baad hado däk do hyb n'aa bë h'yyb tym. Taw'ãäts hë ti né hë ji j'aa etsëe had'yyt hë. Ti né hë had'yyt hë tak'ëp hyb n'aa jawyk do sahõnh hë bag'ãäs doo. Ti né hë had'yyt hë kabaj'aa doo, hejooj had'yyt doo. Ti né hë sahõnh hã mejõ had'yyt doo. Ỹỹ. Tii d' né hë. Taw'ãäts hë. Jããm hë kã.

^f **1.23** Hahỹ d' Gereg kyy me takerii däk: “Taw'ãäts hë sa saroor sii hë bë ty n'aa ges'yyk, nas'aa däk do hyb n'aa tii, nesaa do sa hub me ramoo bok do haj'aa.” Baad ji kan'yyh, sahõnh hë nesaa do ramoo bok do ji tah'yyb tatug mahãnh, tahanãng pé tii.